

Na Risola che fèsc mever via nesc joegn

Chisc dis pea via l prum projet del Pian di Joegn de Fascia co la
sociasion "La Grenz"



Sozieta - La Risola l'é na metafora che raprejenta ben la filosofia del Pian di Joegn de Fascia. La é desche n fior co na pèrt zentrèla che raprejenta l Pian di Joegn, enveze dut chel che vegn fat col Pian di Joegn l'é i "petali", donca i joegn, l desch de lurier, i comuns, la provinzia... ma dut chest per se mever l'à de besegn de forza e aiut, descheche la Risola per sîrèr à de besegn del vent.

Così l Pian di Joegn per funzionèr l'à besegn de la forza de dut l teritorie, l Pian va inant se duc se tegn per man e se deida per l medemo obietif. L slogan "da schiussèna a pavel" raprejenta l percors del Pian di Joegn de la Val de Fascia, coordinà da Susanna Chiocchetti, che l'é pontà via tardif respet ai autres e te n contest olache no l'é mai stat rejonà de politiches di joegn, ma che ades l'é enjignà a ciapèr l sgol, l'é dō a doventèr pavel a troèr na sia forma e sia vida de esser e de lurèr. I prumes e più emportanc obietives de "La Risola" l'é conscidrà i joegn desche na ressorsa, dachelanvia i sensibilisèr a la partegnuda e a la partezipazion de sie teritorie, lurèr en rei e creèr ocajions e esperienzes per la formazion "sozièla e zivila" di joegn, per dapò regoer la idees e les portèr ensema a compiment.

I é 12 i projec che desvalives gropes o sociacions à portà inant e che é stac tout sù dal Pian di Joegn "La Risola": Ncontra i monc del Socors sa mont del Zenter Fascia; Skarabokkio days festival del V.F.H.C. Group; La scelta che te muda la vita del Decanat de Fascia; Formazion guides per l Museo Ladin de l'Istitut Cultural Ladin; Laboratorie èrt e energia de la Consulta de la Families de Fascia; Musega teater e creatività de la Sociasion culturèla musicala "La Grenz"; Corsc de pitura e de beleza de la Sociasion Kultura; Telekids de la Sociasion Sportiva Scufons del Cogo; Cors concors de Cortometrajes de l'Union di Ladins de Fascia; Portal Informatif (projet obligatorie) e l chestionèr Joegn al Spieie.

Chisc dis che vegn pontarà via l prum di projec del Pian di Joegn.

Se trata de la proponeta de la sociasion culturèla musicala "La Grenz", na sociasion nasciuda acà trei egn per slarièr fora e sostegnir la musega de calità, desche forma de enconter e de esprescion culturèla del mond d'aldidanché. La scomenzadiva veit empegnèdes desvaliva socia-

zions e istituzions de la val, te n projet che vel slarièr fora e soscedèr l'interess anter i joegn de na desvaliva fruizion de la musega, veduda desche na forma de cultura e èrt che se lea ence al teater e a la lettradura e che doventa pont de enconter e de dialogh anter cultures e tradizions musicales desferentes. L projet perveit 3 laboratories che se learà duc al CD "Encresciadum", vegnù fora da pech, olache la musega jazz se encontra col ladin e la cultura ladina te n aut livel artistich. Con chest prum projet se ge dèsc ai joegn l met de enjignèr n konzert destinà ai studenc de la Scola de Fascia, che sarà proponet doi outes te la giornèda dai 6 de mé. Chi che tol pèrt a chisc laboratories podarà cognoscer da vejìn i museganc e i autores de chisc toc e soraldut i sarà touc ite te desvalives gropes de lurier col contribut di esperc del setor. I joegn lurarà tant su l'aspet scenografich che su l'aspet leterèr e musical. Così l konzert vegnarà enjignà da ic enstesc trèr l'intervent diret e creatif del grop; se vardarà de creèr la miores condizions percheche i studenc - spetatores i posse se arvejinèr en maniera percacenta a chesta sort de musega e al lengaz jazz e aprijèr miec l valor del patrimoine culturèl e leterèr de la comunità ladina. La scomenzadiva vegn endrezèda dessema a la Sociasion "La Cordèles", l'Istitut Cultural Ladin e vèlch insegnant de la Scola d'Èrt da Poza.

Per maor informazions e per se enscinuèr se pel se oujer fin en vender ai 10 de oril al responsàbol del projet Fabio Chiocchetti al 347.4567428, email info@lagrenz.org o a la referenta del Pian di Joegn Susanna Chiocchetti al 349.0552893 email pianogiovani.fassa@alice.it. La pruma scontrèda del projet per fissèr l calandèr vegnarà tegnuda en mèrtesc ai 14 de oril da les 4 domesdi a Moena aló da "la Grenz". La quota de partezipazion, fissèda te 30 euro, tol ite ence la tessera anuèla "Junior" per i konzerc endrezé ogne setemèna da la sociasion e na copia del CD "Encresciadum".